

ըստ օրէ և կային մնային ի պատերազմ լի սրտմտու-  
թեամբ:

Յետ մահուանէ թագաւորին զաւուրս կը, Հոկ-  
տեմբերի մասոյ ժէշ<sup>(\*)</sup>, կային սպահք<sup>1)</sup> և հայէին բոր-  
բոքմամբ առ ի պատերազմ ընդ միւս գունդն զօրաց:  
Եւ իբրև ոչ անսացին առ ի խաղաղանալ, մուֆթին  
և վէզիրն և զօրապետք զօրացն ընդ նոսա ի մի վայր  
գումարեցան ի տեղին Օրթայ ճամոյ, լի ցասմամբ և  
բարկութեամբ վառեալք սպառազինեալք՝ եկեալ ժա-  
մանեցին ի ձիւնթաց ասպարիսին՝ ի սրահին եէնկի ճա-  
մոյ առ միւս գունդն զօրաց, որ էին ի պատրաստի:  
Եւ կացին յերկուց կողմանց ճակատ առ ճակատ և յա-  
րեան ի վերայ միմեանց զազանացեալ զօրութեամբ.  
Քաջքն խիզախէին, արիացեալքն գոչէին, սուսերքն  
փայլփայլէին և սաղաւարտքն շողշողային և ի բազ-  
մախուռ նիզակացն և ի փայլմանէ պատենաղէն վա-  
ռելոցն՝ ընդ ճառագայթից արեգականն սոսսոսային(?):  
Եւ աստ էր տեսնել զաղէտ և զտազնապ կորստեան  
նոցա, զի որպէս փայտք հարեալք ի փայտահարաց,  
այնպէս հարեալք ի միմեանց բազմահար հարուածովք՝  
անկեալ ի գետնի դիւթաւալ խաղային ի մէջ ճապաղի  
արեանց: Եւ ոմանք ի փախուստ դառնային և ոչ ժա-  
մանէին ի տեղի թաքստեան, այլ հասեալքն զնոսա  
ոչնչացուցանէին. ոմանց սկաւառակն յերկուս հեր-  
ձեալ ըղեղասոյզ սատակէին, ոմանք յերկուս հերձեալ  
և ոմանք գլխահատք, ոմանք կլխամահք լեալ ոտնատ  
և ձեռնատ, քընթատ և ակընջատ տքային և հեծային  
և կսկծանօք զհոգիս իւրեանց արձակէին, և լի լինէր  
արեամբ և դիակամբք շրջապատ և սրահ ճամուռն և  
ի միջի նորա և յելսն մնարային փախուցելոց զօրաց

1) սփահք.

(\*) Լուս. աւուրբ սպարամին: